

ՍԱՍՈՒՆՑԻ ԴԱՎԹԻ ՈՒ ՄԸՍՐԱ ՄԵԼՔԻ ՄԵՆԱՍԱՐՏԸ

(համահավաք բնագրի)

Իրեք կողմնն աշխարհի Մըսրա Մելքի ձեռն էր.
Մենակ մեկ կողմն աշխարհի Դավթի հայրենին էր.
Մելիք կանչեց, իրեն իշխաններ ժողվեց,
Հետո բերավ, տաշտ մի դրեց իրեն առջև,
Ածելի զարկեց իրեն ճակտին,
Արուն թափվեց, տաշտ լցրեց:
Բացեց Մելիք մեկ թուղթ, էն արնով գրեց զորականչ.
«Ինձ պետք են հազար-հազար անբեղ, անմորուս զինվոր.
Ինձ պետք են հազար-հազար էն մոր մինուձար զինվոր.
Ինձ պետք են հազար-հազար թխամազ մորուսով զինվոր.
Ինձ պետք են հազար-հազար սիպտակ մորուսով զինվոր.
Ինձ պետք են հազար-հազար կարմիր մորուսով զինվոր.
Ինձ պետք են հազար-հազար սիպտակ ձիավոր,
Ա՛խ, սիպտակ ձիավոր.
Ինձ պետք են հազար-հազար կարմիր ձիավոր,
Ա՛խ, կարմիր ձիավոր.
Ինձ պետք են հազար-հազար ս՛ն-սն ձիավոր,
Ա՛խ, սն-սն ձիավոր.
Ինձ պետք են հազար-հազար փող փչողներ,
Թմբուկ զարկողներ,
Ա՛խ, թմբուկ զարկողներ.
Էկեք, էկեք, ինձ պետք են բյուր հազար հետևակ զինվոր,
Ա՛խ, հետևակ զինվոր:
Էկեք, էկեք վեր գյավուրին.
Պատերաճմ է, պատերաճմ»:
Էնպես, անթիվ ու անհամար ձիավորներ էկան,
Որ Մըսրա գետ հասած ժամանակ՝
Առաջին էկողներ ջրի կեն խմեցին,
Միջին էկողներ ջրի մնացած կես խմեցին,
Հետո էկողներ գետի քարեր լիզեցին,
Մնացած հեծելներ ծարավ մնացին:
Էկան հասան Մըսրա դաշտին, վրան զարկին
Ու հարցում արին Մըսրա Մելիքին.

Մեր դուշմանն իմ է, իմն հետ տ'ի կռվենք:
Պատասխան տվեց. – Դավիթ անունով Սասնեցին.
Ինձի շատ ու շատ մարդ է կոտորե.
Օգնություն տվեք: Կռիվ տ'երթամ էդ Դավթի դեմ:
Մելիք իր զորքեր առավ,
Ինք էլ ընկավ զորքի առաջ ու դուրս էլավ Սասնա վերա:
Էկավ ու մեջ Լեռա դաշտին բանակ դրավ
Ու անհամար վրան՝ զարկեց:
Էդտեղ Մելիք թուղթ մի գրեց Դավթին.
Դավիթ, կռիվ տ'անես, արի՛ իմ դեմ,
Չէ հո՛ տ'ի տամ ես իմ զորքեր քաղքի վերա,
Կրակ տի տամ Սասնա քաղաք ու տի վառեմ,
Սասնա քար-հող քշեմ գերի:
Առան էդ թուղթ, բերին, տվին Հովանի ձեռ:
Ձենով Հովան կարդաց, ասաց.
– Ջանքմ, էսա իմ վերան է՝ կը գա կրռիվ,
էսքան զորքեր ժողվե-էկեր է, ինչ տ'անենք:
Ո՛չ մարդ ունենք, ո՛չ զորք:
– Հէ, բարեբա՛ր աստված,- կասի,-
Դո՛ւ օգնություն հասնես մեզի:
Դավիթ գնաց Հովանի մոտ, ասաց.
– Հրողբեր Հովան,
Ինձ զենք ու ձի մի տուր, կռիվ տ'երթամ,
Ձենով Հովան ասաց.- Գընա՛,
Գոմի ձիերուց մեկ ջոկի,
Օդի թրերուց էլ թո՛ւր մի ջոկի:
Վերգոն էդտեղ ծաղրով ասաց՝
Դավիթ, որ Մելիք կը սպանես,
էնոր ականջ ինձ նվեր բեր:
Դավիթ ըռկավ, ամա բան չ'ասաց:
Դավիթ գնաց, գոմից կոռտ քուռակ մ'առավ:
Թրերեն էլ ժանգոտ թուր մի առավ,
Ձին հեծավ, քրշեց, գընաց:
Էդ վախտ Արտատեր Պառավ էլավ դեմ Դավթին,
Ասաց. – Դավիթ, ո՛րդի, ինչ տ'անես:
Ասաց. – Կ'երթամ վեր Մըսրա Մելիքին կռիվ:
Պառավ խնդաց Դավթի վերա, ասաց.
Դավիթ, ծո՛ւռ ես, որ էդոնցով կ'երթաս կռիվ:
Բա ափսոս չի՛, որ դու էն հոր տղան ըլնես:
Դավիթ ըռկավ, ասաց. – Պառան՛վ,

Հապա ինչո՞վ էրթամ կռիվ.
Կ՛ուզես՝ անթարոցի՞ց, շիշի՞ց,
Ինչ որ ունես՝ հազի՛ր արա,
Բե՛ր, էնոնցո՞վ էրթամ կռիվ:
Պառա՞վն ասաց.

– Դավի՛թ, մեռնե՛մ քո արևուն,
Մի՛ բարկանա, կ՛էրթաս, քեզ բան ասեմ՝ նո՛ր գընա:
Պառա՞վ, դե, շո՛ւտ, ասա՛ տեսնեմ:
Պառա՞վ ասաց.

«Մագյար չը կա՛ր քո հոր Թուրն Կեծակին,
Մագյար չը կա՛ր քո հոր Քուռկիկ Ջալալին,
Մագյար չը կա՛ր Քուռկուն Նալն պողպատի,
Մագյար չը կա՛ր քո հոր Գյամն պողպատի,
Որ դնես Քուռկիկ Ջալալու բերնին:
Մագյար չը կա՛ր քո հոր Թամքը սաղաֆի,
Ջանգուներ իր վերան կախուկ են ոսկի,
Մագյար չը կա՛ր քո հոր Գուտն ի գլխին.
Մագյար չը կա՛ր քո հոր Կապեն ղադիֆե.
Մագյար չը կա՛ր քո հոր Քամարն ի մեջքին.
Մագյար չը կա՛ր քո հոր Շավարն ի ոտին.
Մագյար չը կա՛ր քո հոր Կոշիկն ի ոտին.
Մագյար չը կա՛ր քո հոր Խաչ Պատերազմին
Վեր իր աջ թևին»:

Ասաց. – Պառավ, էդ բոլոր ո՛րտեղն է:
– Մըբա Մելիքն էկե, քեզնից կռիվ կ՛ուզե,
Գընա, գոռի՛, Հովան թող դո՛ւրս հանի.
Անա խաթրով Հովան չի՛ տա էդա բաներ.
Տ՛էրթաս, էնոր փողպատ պինդ տի բռնես
Ու գոռովե՛ն տ՛առնես:

Դավի՛թ գնաց հրողբոր մոտ.
Իր ձեռ էթալ ու հրողբոր փողպատ բռնեց,
Պինդ թափ էտու, էնոր ոտքեր հողից կտրեց:
Ասաց. – Ես կուզեմ քենե իմ հոր Թո՛ւրն Կեծակին,
Ես կուզեմ քենե իմ հոր Քուռկիկ Ջալալին,
Ես կուզեմ քենե Սանձը պողպատի,
Որ դնեմ Քուռկիկ Ջալալու բերնին:
Ես կուզեմ իմ հոր Թամքը սաղաֆի՝
Վերան կախուկ զանգուներ ոսկի.
Ես կուզեմ քենե իմ հոր Գուտն ի գլխին,
Ես կուզեմ քենե իմ հոր Կապան ղադիֆե,

Ես կուզեմ քենե իմ հոր Քամարն մեջքին,
Ես կուզեմ քենե իմ հոր Շավարն ի ոտին,
Ես կուզեմ քենե իմ հոր Կոշիկն ի ոտին.
Ես կուզեմ քենե իմ հոր Խաչ Պատերազմին,

Կըտաս՝ տո՛ր խաթրով –

Ձեն ի տա՛ կը կայնեմ, գոռովեն կառնեմ:

Հրողբեր դարձավ, ասաց.

Էն բերան կոտրի, որ քեզ սովորցուց.

Էն տարին, ինչ Միեր մեռավ –

Շենքի տակ էնոր գեստեր խորեցի:

Դե գնանք, հանեմ:

Գնացին, հանին:

Դավիթ բերեց տուն, էդ գեստեր հագավ:

Հրողբերն ասաց.

– Մեռնեն քեզ, Դավիթ,

Քո հոր զենք–զրահ, կո՛, էն ներքնատան:

Թե էդ զենք վերուս՝ դու կարնաս կովես,

Թե չէ՛ մի էրթա, չեն կարնա կովես:

Դավիթ էր՝ գնաց, իջավ ներքնատուն,

Իր հոր զենք–զրահ տեսավ պատեն կախ:

Էդ ամեն գրկեց, քաշեց իր թևին,

Դուրս հանեց, բերեց Ձենով Հովանին:

Ձենով Հովան ուրախացավ, ասաց.

– Դավիթ, էն օրից, ինչ քո հեր մեռավ, մինչև էսօր,

Ես քո հոր ձին փակեր էի մեծ գոմ,

Դուռն էլ շարե, հերթիկեն խոտ ու ջուր կը տայի:

Մըսրա Մելքի ահուց չեն իշխենա,

Որ դուռ բանամ, ձին հանեմ դուրս:

Տարավ Դավիթ Ձենով Հովան,

Հեովանց գոմի դուռ շանց տվեց, ասաց,

Դավիթ, քո հոր ձին էստեղն է.

Թե դու կարնաս՝ գնա քաշի, հան դուրս:

Դավիթ դուռ քանդեց, բացեց, մտավ ներս:

Ձին Միերի զենք–զրահներ տեսավ թե չէ,

ճանաչեց, ուրախացավ,

Տոճիկ տվեց ու խրխնջաց:

Դավիթ մոտիկ գնաց ձիուն, մազեր բռնեց,

Աչքեր մաժեց, քամակ մաժեց.

Ձին հոտոտաց, ձին լաց էղավ:

Էլավ Դավիթ, զձին գոմեն քաշեց, հանեց:

...Ձին ասաց.
 – Հայ գիդի մարդ,
 Դու ինձ տներ, ես քե ձի՛ ըլնեք:
 Դավիթ Հովանին ասաց.
 – Հրողբեր, տո՛ւր ինձ Միերի Խաչ Պատերազմին:
 Հրողբերն ասաց.
 – Ես չե՛մ կարնա տա,
 Թե արժան ես՝ կը գա քո թևին,
 Թե արժան չես՝ չի գա քո թևին:
 Էդտեղ աստծու հրամանով
 Խաչ Պատերազմին իջավ վեր աջ թևին:
 Դավիթ էլավ հոր ձին հեծավ,
 Իր հոր ջոջ սազ էտու զարկել...
 Սասուն ողջ ժողովավ Էդտեղ:
 Ձենով Հովան կայնեց, լավ մի աչքեց տղին,
 Սիրտ մըրմըռաց, ըսկսեց լալ, երգով ասաց.
 ... «Ափսո՛ն մեր թառլան Դավիթ»
 Դավիթն ասաց.
 – Հրողբեր, դու մատանղ ըլնես Էդա մեկ խոսքին,
 Էդա մեկ խոսք որ չ'ասեիր՝
 Քո վիզ տի զարկեի.
 Ասաց. – Դավիթ, քո գլխուն մեռնեմ,
 Ախր ես քո ապով կը լամ:



Անթարոց – կրակխառնիչ:
Ապով – պատճառով, համար:
Ջանգու – ասպանդակ:
Կռոտ – գռոտ, քոսոտ, քնձոտ:
Հալա – հապա, ահավասիկ:
Հերթիկ – երդիկ, լուսամուտ կտուրի վրա:
Ղադիֆա – թավիշ:
Մագյար – միթե:
Տոճիկ տալ – ուրախությունից ցատկոտել:
Փողպատ – օձիք:



ՀԱՐՑԵՐ ԵՎ ՍՈՍՑՍԳՐԱՆՔՆԵՐ

1. Ուշադիր կարդա և մի հատված թարգմանիր գրական հայերենով:
2. Բացատրիր Մելիքի պատերազմական գորականչը արյունով գրելու պատկերի խորհրդանշական իմաստը:
3. Համադրիր Դավթի նախապես ձեռք բերած պատերազմելու միջոցները (քնձռոտ ձի և ժանգոտ թուր) և Վերգոյի ծաղրական արտահայտությունը:
4. Գնահատիր այն դերը, որ կատարում է Արտատեր Պառավը՝ Դավթին տված խրատով:
5. Փորձիր բնութագրել Ձենով Հովանի հոգեվիճակն այն պահին, երբ Դավիթը կապել է հոր զենք ու զրահը և հեծանել է հրեղեն Քուռկիկ (Ջալալուն Ձենով Հովանի «սիրտը մրմռում» է, սկսում է լալ ու երգել իր «Ափսո՛ս»-ների շարքը):
6. Բացատրիր անհասկանալի բարբառային բառերը և գրիր դրանց գրական հայերենը՝ կազմելով թեմատիկ բառարան: